



I. ATALA
BIZKAIKO LURRALDE HISTORIKOKO FORU ADMINISTRAZIOA
Batzar Nagusiak

Bizkaiko Batzar Nagusiak

3/2018 FORU ARAUA, maiatzaren 23koa, Bizkaiko Hiri Hondakinak Kudeatzeko 2005-2016 II. Plan Integrala onetsi duen abenduaren 16ko 10/2005 Foru Araua aldatzea onesten duena, aipatutako plan integrala 2020ko abenduaren 31ra arte luzatzeko.

Jakinarazten dut ezen Bizkaiko Batzar Nagusiek, 2018ko maiatzaren 23ko osoko bilkuran, maiatzaren 23ko 3/2018 Foru Araua onartu dutela; haren bidez, Bizkaiko Hiri Hondakinak Kudeatzeko 2005-2016 II. Plan Integrala onetsi duen abenduaren 16ko 10/2005 Foru Araua aldatzea onesten da, aipatutako plan integrala 2020ko abenduaren 31ra arte luzatzeko. Halaber jakinarazten dut arau hori aldarrikatu eta argitaratzeko agindua ematen dudala, araua aplikatu ahal zaien herritar, norbanako eta agintari guztiek bete dezaten eta betearaz dezaten.

Bilbon, 2018ko maiatzaren 24an.

El Diputado General,
UNAI REMENTERIA MAIZ



**ABENDUAREN 16KO 10/2005 FORU ARAUA ALDATZEN DUEN 3/2018 FORU ARAUA,
«BIZKAIKO HIRI HONDAKINAK KUDEATZEKO II. PLAN INTEGRALA 2005-2016»
ONARTZEN DUENA, 2020KO ABENDUAREN 31RA ARTEKO
LUZAPENAREN BITARTEZ**

ATARIKOA

Bizkaiko Batzar Nagusiek, 2005eko abenduaren 16ko osoko bilkuran, Bizkaiko Hiri Hondakinak Kudeatzeko 2005-2016 Plan Integrala onetsi zuten, 10/2005 Foru Arauaren bidez.

Nazioarteko gidaleroei jarraituz, Bizkaiko Foru Aldundiaren hiri-hondakinen arloko politikaren helburua da herritarrei kalitateko zerbitzu bat ematea, Bizkaiko Lurralde Historiko osoan ahalik eta homogenoena eta doituena den kostu batekin eta ingurumen arloko babes-maila handienekin, betiere indarrean dagoen araudiak ezartzen dituen betebeharrak eta garapen iraunkorraren printzipioak bete ahal izateko.

Bizkaiko Foru Aldundiak hiri-hondakinen kudeaketan iraunkortasuna sustatzearen aldeko jarrera du, hau da, hondakin horietako baliabideak ahalik eta gehien aprobetxatzearen alde dago, Europar Batasunak hondakinen kudeaketarako ezarri duen aukeren hierarkiarekin bat etorriz. Hierarkia horren arabera, lehenengo eta behin, prebentzioko jardueri ekin behar zaie, birziklapen eta balorazioko ekintzekin batera, eta, azkenik, gainerako hondakinak —arriskugarritasuna murriztu eta gero— modu seguruan desagerrarazteko lanei.

BHHKPIren «22. Planaren jarraipena, kontrola eta berrikusketa» atalean adierazten denez, planaren hiru berrikuspen egin dira.

2017ko urriaren 9an, Iraunkortasuna eta Ingurune Naturala Zaintzeko foru-diputatuak Bizkaiko Hiri Hondakinak Kudeatzeko 2005-2016 Plan Integralaren hirugarren berrikuspenaren berri eman zuen Iraunkortasunerako eta Ingurune Naturalerako Batzordean.

Bizkaiko Hiri Hondakinak Kudeatzeko 2005-2016 Plan Integralaren hirugarren berrikuspenetik atera diren ondorioen artean, adierazi behar da Espainiako estatuak eta EAEk eremu honetan ezarri dituzten helburuetako gehienak bete dituela Bizkaiak.

Ez da bete hondakin gordinik —aurretiko tratamendurik gabeko hondakinik— batere zabortegira ez isurtzearen helburua, eta partez bete dira aparatu elektriko eta elektroniko-koen gaikako bilketari lotutakoak eta beirazko ontzien, paper-kartoiaren, metalen, plastikoen eta egurraren birziklatze-indizeei lotutakoak.

Zehazki, Bizkaian, 527 kilo hiri-hondakin sortu dira biztanleko eta urteko, hau da, 2001. urtean sortutako kilo-kopuru bera; beraz, Garapen Iraunkorreko Euskal Ingurumen Estrategian (2002-2020) xedatutakoa bete da. Estrategia horrek 2020. urterako ezarri zuen zabortegira isuritako hondakinen kopuruak %30ekoa izan behar zuela gehienez. Gure lurraldean ehuneko hori %19,1 izan da, 2016. urtean.

Bizkaiak orobat bete ditu Estatuak pila, bateria eta metagailuen hondakinei dagokien ezarri zituen indizeak. Zehazki, 2020. urterako, %50eko birziklatze-tasa ezarri zuen, eta Bizkaian, dagoeneko, halako hondakinen %80,6 birziklatu da, 2016. urtean.

Era berean, betetako helburutzat jo behar da abenduaren 27ko 1481/2001 Errege Dekretuak (hondakinak hondakindegietan uzteari buruzkoa) hondakin biodegradagarriei dagokienez xedatutakoa. Hain zuzen, 1995ean hondakindegietan uzten ziren hondakin biodegradagarrien kopurua 2016. urterakoa %25era murrizteko helburua ezarri zuen errege-dekretu horrek. Bizkaian, azken murrizketa hori 130.768 tona hondakin biodegradagarritan ezarri zen. Kopuru hori iaz zabortegian isuri ziren hondakinon benetako zifraren (45.625 tona) oso gaineratik dago.

Halaber, ontzi eta bilgarrien hondakinen balorizazio-tasa gainditu dugu. Beirazko ontzien, paper-kartoiaren, metalen, plastikoen eta egurraren pisu guztiaren %60ko tasa ezarri zuen Estatuak, eta, Bizkaian, ontzi eta bilgarrien hondakinen %72,8ko balorizazioa lortu dugu.



Bizkaiak partez bete ditu Estatuaren araudiak ezartzen dituen beste helburu batzuk. Esaterako, ez da osorik bete aparatu elektriko eta elektronikoen gaikako bilketaren indizea (4,6 kilo urteko eta biztanleko), baina hurbil gaude, 3,36 kilo biltzen baitira urteko eta biztanleko, eta ez da heldu %60ko birziklatze-tasara beirazko ontzien eta paper-kartoiaren kasuan (haien tasa %59 eta %54 izan dira, hurrenez hurren). Baina, metalezko ontzien, plastikoen eta egurraren birziklatze-tasak gainditu egin ditu ezarritako helburuak.

Bestalde, ez da bete BHHKPIIn bertan zein Eusko Jaurlaritzaren 2007-2010 Ingurumen Esparru Programan ezarritako helburu bat, hondakin gordinek batere zabortegeira ez isurtzea, alegia. Zabortegeiren erabilera murriztuz joan da 2004. urtetik: orduan sortutako hondakinen %53,8 isurtzen zen zabortegeira; 2016. urtean, berriz, %19,1 besterik ez. Hala ere, oraindik ere badago zer hobetu, helburu hau bete ahal izateko.

Bizkaiko Hiri Hondakinak Kudeatzeko Plan Integralaren berrikuspenaren funtsezko alderdietako bat da agiri horretan jasotzen diren helburuak bete diren aztertzea. Ildo horretan, nabarmendu beharrekoa da prebentzioari eta berrerabilpenerako prestatze-lanari esker hauek lortu direla: pertsonako eta eguneko sortutako hondakin-kopurua 1,13 kilo izatea, (2016an sortu zen kopuru bera); merkataritzako hondakinak ez izatea 220.000 tonatik gorakoak (iaz, 130.018 tona izan ziren) eta hiri-hondakinek 697.000 tona ez gainditzea (2016an, 605.232 tona sortu ziren).

Hiri-hondakinen birziklatzeari lotutako helburua ere bete da: BHHKPIIn %40ko tasa ezarri zen, eta iaz hondakinen %43,78 birziklatu zen. Ez da heldu, baina, konpostajerako ezarritako %4ko tasara; %1,1ean geratu baita. Beraz, hasiera batean jarritako ehuneko horretara gutxienez iristeko, neurri berriak hartuko dira, eta jarduketa osagarriak abiaraziko.

Esan bezala, ezin izan da lortu hondakin gordinek batere zabortegeira ez isurtzearen helburua. Baina amaitu egin da lurraldearen beharrezko erantzuteko ezinbestekoak diren azpiegiturak, hiri-hondakinak kudeatzeko direnak, Bizkaia osoan ezartzeko prozesua.

Egindako azterketatik ondorioztatu dugu Bizkaiko hondakin-kudeaketarako politika bat datorrela Europako gidalerroekin. Eta kontuan hartuta ekonomia zirkularren pake-tearen aldaketa batzuk aurrez ikusita daudela hondakin, zabortege, ontzi, ibilgailu, pila eta metagailuen eta aparatu elektriko eta elektronikoen hondakinen esparru-direktibetan, egokiena dirudi BHHKPIren indarraldia 2020. urtera arte luzatzea; gainera, urte horretan amaitzen da Euskal Autonomia Erkidegoko Hondakinak Prebenitu eta Kudeatzeko Planaren indarraldia.

Luzapenaren bidez, aldaketa horiek 2030. urtera arte ezarriko dituzten erronken araberako plangintza bat egin nahi da, eta, bereziki, erronka hauei heldu nahi zaie: hondakinen sorreraren prebentzioa; hiri-hondakinen berrerabilpena eta birziklapena bultzatzea; etxeko eta merkataritzako hondakin guztien pisuaren %50 berrerabilpen eta birziklapenerako prestatzeko izatea lortzea, hondakinei eta lurzoru kutsatuei buruzko 22/2011 Legearekin bat; zabortegeietara hiri-hondakin gordinek edo lehen mailakorik batere ez isurtzea lortzea, eta hiri- eta merkataritza-hondakinen materia biodegradagarriaren gaikako bilketa sustatzea.

Bestalde, Euskal Herriko Ingurugiroa Babesteko 3/1998 Legearen 74. artikulua hiri-hondakinen arloan xedatzen duenarekin bat, Bizkaiko Foru Aldundiari hauek dagozkie:

- a) Hiri-hondakin solidoen esparru-plangintza garatzea, foru-planen bidez.
- b) Udal jarduketak koordinatzea, arlo honetako zerbitzuen prestazio integrala bermatzeko.
- c) Hondakinak kudeatzeko udalez gaindiko azpiegiturak bultzatzea.

Bizkaiko Lurralde Historikoaren Iraunkortasunerako Kontseiluaren urriaren 30eko bilera, aldeko txostena eman zitzaion Bizkaiko Hiri Hondakinak Kudeatzeko 2005-2016 Plan Integrala 2020ko abenduaren 31ra arte luzatzeari.

Azkenik, Bizkaiko Lurralde Historikoko Foru Erakundearen Hautapen, Antolaketa, Araubide eta Jardunbideari buruzko otsailaren 13ko 3/1987 Foru Arauaren 7.2a) artikulua araber, Batzar Nagusiek lurralde osoari eragiten dioten plan sektorialak onesteko eskumena dute.

**Artikulu bakarra**

Bizkaiko Hiri Hondakinak Kudeatzeko 2005-2016 II. Plan Integrala luzapena.

Abenduaren 16ko 10/2005 Foru Arauan araututako Bizkaiko Hiri Hondakinak Kudeatzeko 2005-2016 II. Plan Integrala 2020ko abenduaren 31ra arte luzatzea onesten da.

AZKEN XEDAPENAK**Azken xedapenetako lehena.— *Araudi garapenerako baimena***

Baimena eman zaio Bizkaiko Foru Aldundiari foru-arau hau garatzeko eta betetzeko beharrezkoak diren xedapen guztiak eman ditzan.

Azken xedapenetako bigarrena.— *Indarrean jartzea*

Bizkaiko Aldizkari Ofizialean argitaratu eta biharamunean jarriko da indarrean foru arau hau.

Bilbon, 2018ko maiatzaren 24an.

Batzar Nagusietako Lehenengo Idazkariak,
KOLDO MEDIAVILLA AMARIKA

Batzar Nagusietako Lehendakariak,
ANA OTADUI BITERI